

務簡省豈不有妙伏惟 上裁 上召掌務補闕尹須曰予之此行欲治疾也但以民弊為言不虞予疾何哉遂 不允○癸丑

雷電大風雨雹○上置酒新宮涼廳南陽伯洪永通昌寧府院君成汝完與焉 潜邸故人也判三司事鄭道傳賦詩以獻禁

院春深花正繁為招耆舊置金樽天工忽放知時雨便覺渾身雨露息○甲寅 幸平州溫水○宥趙璞遣人召之○丙辰

上次舊京○丁巳遣校書少監鄭渾于京畿左道及忠清道點考兵船虛實軍將能否○戊午 上出籍田郊觀放海青○夏

四月甲子雨赤氣中天○上至溫泉○令三軍府刊行蒐狩圖陣圖○乙丑平壤尹慶儀卒儀清州人左侍中貞烈公復興之

子性儉直無所修飾歷仕至叅贊門下出為西北面兵馬都節制使兼尹平壤卒謚順節子習○丁卯大司憲朴經等上言前

朝之季田制紊亂豪強兼并倉庾空竭爭訟日繁骨肉相殘殿下即位之初損益制度遂正經界將京畿左右道及六道之

田以定 陵寢倉庫軍資公廨寺院田學校神祠鄉津驛吏紙